

南潯志卷二十三

里人周慶雲纂

方外

宋 法照

宗偉

元 普應

明 淨戒

株宏

行恣

清 願如 湘潭

大全

淨孝 秉遠

靈璧 超一

懸證

蔭在 戒石 明鑑

宗嚴 浣塵

秉融 學讓 達塵

南潯志

卷二十三

方外

一

達曾 悟詮 證淳

崔和尚

慧澄

慧性 已上僧

周科耀 毛橫庵 閔九陽

沈澄初 已上道士

智緣 尼

宋

法照字悟心崇德人紹興間興建祇園寺

汪志

宗偉永嘉人開禧間學道尋師至南林愛其風土結草庵居焉

嘗血指書報身佛所說經口不絕誦興建報國寺

汪志

元

普應國師證道之後因欲避世多好船中居至大己酉泊儀真辛亥泊吳江延祐泊南潯故詠船居者頗多而廣錄中所載者



僅一二耳宋濂跋德禪師船居詩後

明

淨戒俗姓王字定巖號幻居南柵人身居桑門心存孝道出家於種福院後遊諸方參禮名師天竺虎跑靈谷諸寺皆有遺跡官至左覺義左講經受勅為慧濟禪師無疾而寂茶毘時有五色雲如蓋又有四鶴來飛弟子宗夔奉其不燼之齒牙數珠葬于道場山之太師塢有語錄行于世汪志

祿宏字佛慧號蓮池仁和沈氏子初為博士弟子棄而事佛從蜀師剃度受具遊方住吾潯豆腐橋廢寺中苦行三年無知者由潯至雲樓汪志見山水幽寂遂有終焉之志結茆三楹倚壁危坐環山多虎患師發悲懇諷經施食虎遂遠徙歲大旱擊木魚

南潯志

卷二十三 方外

二

循田念佛兩隨足跡而至居民德之遂成蘭若道風大扇四眾歛集首倡毘尼以立基本單提念佛以攝禪淨人稱雲棲菩薩列朝詩集住山三十餘年別眾示寂 國朝雍正十二年 敕封淨

妙真修禪師汪志

行恣字口擇號復元湖州人少出紫柏大師真可之門而不相下居於南潯工詩朱國禎董斯張並與結方外社斯張稱其口不談貴介筆不流凡近為刻其詩以傳汪志馮開之序且止庵詩集謂恣公詩清真孤迥如倪元鎮畫遠水疎林孤亭片石絕無

酸餽氣采訪冊

清

願如或云名慧裔字南林報國寺沙彌寺久廢斷一臂誓還舊



觀董斯張爲作緣起後鬱成樓閣南林者寺古名其爲字所以誓也順治中年六十餘尙健理院事康熙初卒雍正時有湘潭者失其名復斷一手倡募重修報國寺汪志

大全字雲浪姓趙氏改姓薛年十四觀雲棲遺像決志出家寓皋亭龍居苦心參究見松針墜地廓然有省初住嘉興之碧雲後住湖州之東藏性落拓不事威儀見解既高於世無染素直言或偶談人過不知者皆怪之順治己亥之冬爲蜚語所中擠狴犴端坐微笑而逝年五十八汪志

淨孝字此山姓周氏名廖字澹城吳縣諸生按張雋和此翁秋自注姓廖號澹城攷雋作歲交詩序此翁以孝動天子兩節母死生得喪揚未幾天地崩圻寄命戈鋌云云據蘇州府志吳縣周重仁妻王氏嗣子士元妻陸氏姑節婦孝並於崇禎十四年旌別無廖姓雙節事蓋雋誤以名廖爲姓廖也少孤事

南潯志

卷二十三

方外

三

母以孝聞鼎革時逃于禪爲漁庵禪師明聞法嗣從董漢策募長生寺旁地爲明聞造骨塔創建塔院黃周星爲題歲寒堂額能詩善畫梅與南潛友善著歲交詩自譜其流連廢興之迹又著枯木吟中有建院鑄像營塔鑿池諸詩卽記創院事也後有秉遠字覺先晚自號幻空本吳江陸氏子住持長生寺所著詩亦名枯木吟汪志

靈璧號竹憨吳江人來潯寓圓通庵善山水花鳥多墨筆自率胸臆腕略恣肆兼長草書復善詩又有超一字參魯震澤鎮莊氏子出家姚田庵後爲堯峯主席詣力精純門庭嚴峻年七十示期趺坐而化汪志

懸證初名元證故副使孫旭也其父自紹興遷潯旭字子旦少



機警歸安籍康熙丙午武科舉人屢遊京邸不遇還而皈依南  
潛字之曰轉庵耿精忠反總督姚啟聖募士入閩旭往應募貌  
既修偉又有口才啟聖悅之旭請招某山寇寇受撫偕旭至縣  
縣令以賓禮待之縣有捕役素恨旭白令曰旭所招盜名在捕  
中有年矣按縣牘良然於是執旭及盜鞠訊具服解赴浙省臬  
司獄時軍事旁午囚多淹禁旭與解役私相結乃移旭還縣出  
北新關遂與解役逸凡七日而至建昌府詣樂燦軍樂燦者耿  
逆之大帥也旭改姓名爲王懷明自言聚兵爲義師不幸而敗  
燦及參軍周發祥信之爲具衣冠署僞職燦敗發祥以殘卒千  
人歸吉安賊將韓大任大任求幕客發祥以旭應一見相契遂  
用事權傾一軍 大兵圍城簡王安王皆招降大任猶豫時康

南潯志

卷二十三

方外

四

王偕姚啟聖經畧閩事旭欲大任就啟聖諸招降者皆阻不允  
贛州折爾肯遣魏祥來招降祥字善伯寧都人負重名旭忌其  
才恐大任爲所動則奪我閩約構祥於大任大任入其言怒曰  
二王招我我且未許折爾肯何人乃欲以藩臬爲餌乎命旭收  
祥榜掠慘毒發祥爭之不能竟殺之旭日說大任入閩大任亦  
以諸招降前已皆不允非閩不可遂從旭言降于閩旭以招降  
功議敘任貴州糧儲道按察副使練兵督餉上臺頗稱其能未  
幾滇黔削平凡投誠者槩不錄歸里一門血屬死無子遺廬舍  
亦焚毀一空旭自傷遂祝髮爲僧於仁王山之寶華庵自謂精  
于數學高談雄辨純用機法聳動搢紳當道雖山居蓬屋戶外  
屢常滿者四十年壽八十三卒有侶雲詩集

汪志按庭間錄旭爲僧號諦暉住持



靈隱寺今攷張彙諦暉和尚塔銘及厲鶚雲林寺志諦暉名慧  
輅吳興金田沈氏子順治中已出家雍正三年卒年九十九乃  
別是一人庭聞錄誤也慶雲按覺羅榘獻亭續錄所載轉庵  
和尚事略與此傳不同之點甚多因並錄之和尚俗姓孫名  
旭餘姚人嘗中順治丁酉武科家甚豪富喜施予鄉人感其惠  
有盜邱甲聚不逞數十人為閭閻之害邑令不敢搜君慨然曰  
目覩鄉里受害而不為拯援非人也因選強弓利矢命壯士負  
羈夜攻其巢咸射殺之獨邱甲潛逃隱恨刺骨時海禁森嚴君  
素慕鄭延平知人嘗謂人曰今之人豪惟海上鄭公邱甲挾蜚  
語訟諸邑中邑令亦與君素有隙因誣君通海上置詔獄中君  
素勇健夜毀柵踰垣出匿某舍家久之亡去滇南吳逆叛偽  
將軍韓大任招至帳下甚為賞鑒曰奇男子也大任屢寇萍鄉  
為安親王軍所阻吳逆促其師期大任爽然曰吾竭力以事吳  
王何相迫若是之急君聞其語大悅曰此丈夫報國時也因說  
大任曰將軍之事吳王已至矣為之闢地攻城戰無不克數月  
之間招徠數郡未聞王有尺素之獎今一旦偶愆師期即肆意  
辱詈待以奴隸兵戈方始其慢士已如此吾恐鐘室之禍復見  
於君也韓為色沮會先良王遣姚制府往招撫大任遲疑未決  
君復進曰今大清恢復閩越事業已成吳王之敗在於日蹙將  
軍何尚作兒女之態也大任乃從撫先良王承制表授道銜君  
慨然曰吾本國家赤子不幸陷於非罪不得已逃諸賊藪今得  
返歸鄉井復為聖世之氓吾志已伸敢以纍囚之軀污章甫之

南潯志

卷二十三

方外

五

榮哉因辭職不受久之薙髮為僧居杭州偕  
雲庵號轉庵和尚年八十餘始逝亦奇人也

蔭在字香谷一字願桂號橙庵吳江皇甫氏子順治丁亥年十  
一為僧于葉港妙華庵丙申來潯住明義庵從張雋遊授以詩  
訣始以詩鳴參南潛于補船村遂師事焉後之海寧旋歸胡樓  
雙林寺乙巳隨南潛作楚遊以病目先歸復至雙林嘗主菁山  
常照寺以患癥結歸刺舌血寫華嚴經未竟卒於妙華年三十  
八庵側民家未幾生子不如葦血長願出家于庵亦刺舌血續  
書之既竣旋示寂咸以為蔭在轉世云弟子戒石字友山住雙  
林寺亦能詩時往來于潯是時明義庵僧能詩者又有明鑒字  
無塵號掃葉行者汪志  
宗嚴字霽庵本姓丁西柵裘莊人所居埭溪後為江蘇涪溪妙



智寺僧喜文墨爲詩格韻恬靜在中唐晚唐之間有曉宜齋遺稿爲其族人丁蟾錄而序之妙智寺 國朝以來其緇流卓越者如月堂岳青且平南詢止三默安諸人率皆博雅工吟詠與當時名人相酬唱而霽公尤雅迨後繼起者有浣塵卽丁蟾從弟在瞻祝髮於此亦能詩而懶不收拾乾隆十八年主雲林方丈二十年蒙 恩賜 紫妙智之名之甲於數郡其賴霽公諸人倡於前尤藉在瞻之繼於後云

采曉宜齋詩序

秉融一作智融字覺海一作學海號問月又號得閒系出餘姚王氏其父渡江來潯教授童子因家焉幼好獨處不苟葷血七歲出家明義庵受詩法于紀遠從遊垂三十年遠歿助其喪葬又刻遺詩將示寂諸法孫請留一偈曰赤條條來赤條條去死

南潯志

卷二十三

方外

六

了便燒復留何偈遂趺坐而逝年四十八建塔弁山之麓潯上詩僧有學讓字月樵吳江人吳中積善寺僧後主潯東極樂庵又有達塵亦字月樵震澤馬氏子梅堰顯忠寺僧嘗授徒于潯居東藏寺妙境庵圓通庵者數年

汪志

達曾字竺峯

汪志

震澤人東藏寺僧自爲沙彌後志量濶遠便思

振興梵宇及長才識過人凡重任鉅舉及人所難能之事獨喜當之無倦色震邑有崇福永樂寺者在麻溪之濱久廢師往爲募貲重建務極宏麗凡數載訖工仍返東藏東藏亦舊刹而寮舍不多規模甚狹師乃相度其勢逐漸改營弗吝所費旣久遂成名藍平生澹泊自持能鼓琴喜吟小詩畫梅師煮石山農疏峭厯落得法外意弟子悟詮號柳橋儒家子嗜古精鑿工書所



蓄端硯多上品柳公弟子證淳汪志作字墨緣幼習楷法兼畫

山水俱有秀挺之致學詩更超畫參香光之席墨林今話其一種書

生氣象尤非尋常禪和子所能望其肩項陸長春答竺武進湯

都督貽汾見其所作極稱賞即馳緘素乞畫而墨緣已抱疾不

能起辛卯六月竟化去年纔二十九墨緣體素弱清削見骨而

負氣兀傲其于緇流罕有合意獨喜親才藝之士固亦矯矯自

拔者墨林今話

崔和尚失其名一姓胡氏詩人胡珊之子家在北柵幼為僧于

川廣之間母老家貧依兄嫂以居一日母病亟念少子不置僧

忽歸攜金與兄供藥餌且曰母疾無妨尚須數年耳母果漸瘳

僧乃辭母泣然而行謂兄曰吾不能復與母言矣五年後當再

南潯志 卷二十三 方外 七

來襄兄大事也至期母又病僧復來則母已神昏不能言因出

數十金經紀喪事營葬畢乃別兄曰此後當雲遊了生死大事

兄亦不久歸山矣逾年兄歿遂不復來汪志

慧澄南潯方丈港朱氏子名璇自幼茹素年十八隨父至武林

遊雲棲徘徊其間遂有離塵之想歸家梵誦如素習已而至鎮

江金山寺削髮居三年復歸故里里有民心寺枯寂殘破慧澄

卓錫其中虔修禮誦四方僧侶咸樂親焉於是募建殿宇重裝

佛像不十年蔚為巨剎復築望暉樓環植梅花花時集居士數

輩吟嘯其中慧澄又工琴偶一勾撥淵淵作金石聲所為詩託

物喻情無非發明宗門心要故人皆尊崇而敬禮之惜所作不

傳采訪冊



慧性逸其名台州人中年在天台山某寺祝髮光緒初朝山至南潯南柵康王寺而卓錫焉寺門供關帝屋瓦僅存非社飲無香火然地當孔道行人憩息早晚尤多慧性於隙地栽蔬種竹禪誦之餘兼課農桑出其餘力日施茶夕燃燈鄉人稱便咸與敬禮居數年重建武聖殿鎮紳周昌大憐其誠而嘉其勤贊助之力居多而慧性益加奮勉修康王寺橋則監工有勞鋪簡五塘石路則獨力籌款復於廟旁建觀音大殿及天王殿榜曰裒能古寺觀音殿後擬建文昌閣乃籌捐未集而怛化慧性抱扶危濟困之懷已無力則募之人適鎮紳劉鏞好善彌篤晚年購米濟四鄉之艱食者曰愛米注冊領米歲以爲常南鄉一帶分配升斗悉委諸慧性慧性實心任事不辭勞瘁跡其生平行事皆足以信今而傳後豈可以常僧例之

采訪冊

已上僧

南潯志

卷二十三

方外

八

周科耀一名道昱字靜涵嘉興人初居武康昇元觀後住潯南廣惠宮清靜自修習青符五雷秘法雍正癸丑夏大旱延科耀登壇禱雨立應知府唐紹祖褒以詩并序知縣羅愨給爲霖潤物扁額手輯昇元觀事自元人戴表元以後名士之記序題詠都爲一集著補閒吟草四卷廣惠宮又有毛樸庵失其名又有閔九陽並能詩

汪志

沈澄初名一秋自號白華道人本德清儒家子居塘栖白栗山之福清宮性嗜梅滿山徧植梅花當梅花盛開輒晝夜坐臥其中善畫工詩光緒壬午癸未間寓南潯城隍廟賣畫自給山水



人物花鳥莫不神妙筆意蒼古渾脫自成一家咸同以來罕有  
其匹後歸福清宮卒年五十七

李宗賢墨  
溪曠墨

已上道士

智緣字常一嘉興荷花地蔡氏女也年十七皈依明巖爲師十  
九歲披薙住嘉興保壽院焚修勤學潯北萬善庵始于明季有  
東明永遠兩比丘尼募隙地于董氏創建殿宇康熙中延陽山  
崧濟住持二載癸巳復延智緣主方丈規制悉依雲棲祿宏之  
法駐錫萬善數十年

汪志

已上尼

南潯志

卷二十三

方外

九

南潯志卷二十三終